

Forfatter: Blicher, Steen Steensen

Titel: Udrag fra E Bindstouw (DK) (paralleltekst med Rigsmålgengivelse)

Citation: Blicher, Steen Steensen: "Noveller", i Blicher, Steen Steensen: *Noveller*, udg. af Esther Kielberg ; Henrik Ljungberg , Det Danske Sprog- og Litteraturselskab, Borgen, 1991, s. 270. Onlineudgave fra Arkiv for Dansk Litteratur: <https://tekster.kb.dk/catalog/adl-texts-blic03val-shoot-idm140515387099104/facsimile.pdf> (tilgået 18. april 2024)

Anvendt udgave: Noveller

Fa Brudden kam, aa kieg dærued – aa de wa Muorens Sessel –  
Hun slow hin Hinne te hin Lohr aalt mæ saa stuer en Ræssel.

»Aa Herreguj! hwa sier A no! to de æ Pie dæ stoer.  
Aah Pier! A vinted ætte Dæ i samful ølle Oer.  
Mi Faer aa Muer æ begi óøh – hwi skull A go fræ Goren?  
Do kam jow ert – Do skrøw jow ert – no ær A gywt mæ Soren.»

»Hwa skull A skryw mæ, Sessellil! mi høwer Arm æ henn;  
Aa fahr i Krie aa fremmed Lann A ku jow ingen senn.  
A æ en Krøvl; de sie Do wal, aa ingen Minnesk notte –  
Gud give det, jeg maatte snart herfra til Graven fløtte!»

»Gi Dæ tefres!» saah hun «Do skal slet ikke suk faa Brøe!  
Saalæng vi Anner haer en Koen, da skal Do ert i Noe!  
Do ka jo blyww som Do haa' wot i gammel Tie i Goeren!  
Kom inh aa sæt Dæ ve wo Skyw! saa ka vi snakh mæ Soren!»

Si no ær A en gammel Kaael, aa gor aa utter Foer;  
A foh mi Føh aa Klæjmon i Muoten Jensens Goer.  
A fløtte Kyer, A fløtte Hæjst, aa Smotow sier A ætter;  
Aa somri po mi venster Arm A bærer Sessels Dætter.»

---

Da no den hæ Vihs om den jenarmed Sældaat war ued, saa tow Wolle  
Vistisen ve igjen, aa saah: «A skal indda beskryww Jer, hudden de gik  
mæ de Oer, A tint dærowwer i Kjøwvenhawn. A haar inno gjemt de  
Brøw, A skrøw hjem, aa no vel A lehs ed faa Jer:

No er A da bløwn Kusk ve en Brandispettøt, aa hwi sommensti I  
so mæ no, kun A rele ræh Jer hen, faa nærensti A sedder o e Bok, sir  
A ud som en Bjørn, faar A haar en Ullenskjøt aa baare Ræwbælle, aa  
en laajn Kabus mæ en Ræwhaal i e Nak. Den naadde Frow saah føst,  
te de sku wot en Ræwrump; men saa saah A: »Nej ejs manne Tak, de  
passer A et om.»

De vass A haad her, de føst A kam her, war ejs aa faasto dje Snak:  
den naadde Frow wa rejn Tysk i hinne Taahl. En Swonstæg kaller